

In hac Vrbs est *Marocum*, quod *Bocanum Hemerum* Ptol. fuisse quidam suspicantur. Hæc inter maximas totius Orbis terrarum urbes adnumerari solet. Est enim inaudita magnitudinis: ita ut sub Principe suo *Hali Iosephi* Filio domus numeraretur plus quam centies mille. Portas in ambitu habebat viginti quatuor: sed hæc ampla quondam & celebris urbs, nunc ita frequentibus Arabum excursionib. attrita est, ut vix tertia urbis portio Incolas habeat. Sunt & in hoc territorio Vrbes alię minorum gentium. Opida: *Elgiumuha*, Opidum exiguum, in planicie, prope fluvium *Sesbeva*, ab Africanis conditum; *Tenezza* Civitas munita, olim exstructa ab Africanis in latere illius partis Atlantis quę dicitur *Ghedmina*; *Delgiumuha* Civitas nova in Monte altissimo sita, Arx valida; *Imizmiza* Vrbs ampla Scopulo insidens; *Tefrast* exiguum Opidum in ripa fluvij *Asifemel* positum; *Agmet* & *Hanimmei*. *Guzzula* ad Septentrionem Atlanti adheret, ad Ortum Hęc jungitur. Mittit hæc Regio Hordeum magna copia, & pecudes innumeras, habetque Aris & Ferri Fodinas. Opida hic & Arces vallo carent: pagi frequentes, ampli, divites: regio omnis Incolis referta. *Duccala* regio ab Occasu a *Tensisto* fluv. initium capit, terminatur a Septentrione Oceano, a Meridie fl. *Habel* clauditur, atque ab Occidente fluvio *Hammirabih*. Pauca in hac Civitates muris cinctæ. Inter quas *Azafi* Civitas in littore Oceani sita. Condiderunt eam Africani: *Conte* a Gothis & *Tit* ab Africanis condita; *Elmedina* quasi totius hujus Regionis Caput; *Cen-topoZZi* Opidum exiguum; *Subeit*, *Temaracost*, *Terga*, *Bulativan*, *Azamur*, & *Meramer*. *Hascora* regio ad Septentrionem *Duccalæ* confinis est, ad Occasum terminatur *Tensisto* fluv. & ad Ortum fluvio *Quadelhabit* a regione *Tedeletes* discluditur. Multa ad hanc regionem pertinent Opida opulentissima, populo satis numerosa, ut *Alemdia* Civitas in valle quadam quæ quatuor altis Montib. cincta est, exstructa: quam Nobiles, Mercatores & Artifices habitant: *Tagodast* in cacumine Montis sita, quatuor alijs circumdata: *Elgiumuha* in monte altissimo condita, inter duos alios non minoris altitudinis: & *Bzo* Civitas antiqua in Monte admodum sublimi posita viginti circiter Milliaria *Elgiumuha* distans, versus Occasum. *Tedles* regio non adeo ampla est, ab Occasu terminatur fluminibus *Servi* & *Ommirabih*, ad Meridiem Atlanti contigua est: ad Septentrionem vero terminatur, ubi fl. *Servi* in fluvium *Omirabih* prolabitur, unde regio ipsa triangulari forma clauditur. Sunt in ea nonnulla Opida: Præcipuum est *Teska*, ab Africanis conditum, populo satis frequens. Sunt & *Ejza*, *Gibiteb*, & alia. Præcipua Flumina hujus Regni sunt *Tensist* & *Omirabih*, qui ex Atlante Monte erumpentes in Oceanum se exonerant. Sed *Tensist* oritur in marocci territorio, ac plurimis augetur fluvij, inter quos magni sunt *Sifemel* & *Niffis*.

*Omirabih*

*Flumina.*